



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 7



Babur, Aurangzeb aser Nizam nunger putiotsü nungi aitoktsü: Assam CM

UP nung JD(U) aser BJP na longjemer tokteptsü: Kushwaha



VOL. XIX NO. 87 (ADOK 87)

DIMAPUR

TENTONÜ

(MONDAY) AENJETI (JANUARY) 10, 2022

₹ 5.00

COVID-19 Nagaland: 6 dak putet & 4 taneptsü angu

Kohima, January 9, 2022 (TYO): Nagaland nung Honibarnü nisung 6 dak COVID-19 putet aser 4 taneptsü angu.

Tanü Dimapur nung nisung 6 dak putet aser Kohima nung nisung 4 taneptsü angu.

Nisung 32,270 rongnungi 30,405 taneptsü nguogo aser ibaji taneptsü angur 94.22% lir.

Tang Nagaland nung nisung 81 anepaludar saka parnok 67 dakbo shirangba yimya kecha mali.

Hokolbar tashi nung arishi küm 15 nungi 18 tsungda tanur 1,544 nem COVID-19 vaccine agütsüogo.

"Honibar tashi nung nisung

761,772 nem COVID-19 vaccine indang dose 13,42,603 agütsüogo" ta State Immunization Officer Dr Ritu Thurr-i ashi.

Vaccine agirtemji frontline workers 60,985, healthcare workers 16,005, arishi küm 45 ser temapur 214,392 aser arishi küm 18 nungi 44 tsungda alir 470,390 lir, ta pai ashi.

"Vaccine agirtem rongnungi nisung 580,831-i dose anaprong agiogo. Parnokji frontline workers 48,627, healthcare workers 13,544, arishi küm 45 ser temapur 179,725 aser arishi küm 18 nungi 44 tsungda alir 338,935 lir" ta Dr Thurr-isa ashi.

Deltacron ta ser COVID-19 variant tasen ka putet

Guwahati, January 9, 2022 (Agencies): Omicron aser IHU putetba sülen Cyprus linük nung COVID-19 indang variant tasen ka putetogo.

Iba variant ya Cyprus nung nisung 25 dak puteta lir.

Iba variant ya Deltacron lir aser Delta variant indang genetic background aser Omicron indang

mutations kar den mesüktepa lir. Cyprus nung sample 25 tendangdang Deltacron nung Omicron indang mutations 10 tashi aliba bushitet.

"Iba variant tasen atema tang atemabo shisabulua mebilemetsüla" ta Cyprus indang Health Minister Michalis Hadjipandelas-i metetdaksüogo.

State 5 election nung Congress-i CM candidate meshimtsü



New Delhi, January 9, 2022 (Agencies): India kübok state pungu nung Assembly elections agidang Congress-i chief minister nübo meshimi dang tokteptsü.

Election result adokba sülen ang Congress-i chief minister nübo shimtsü aser Congress legislative party-i high command nungi temelaba meshia leader shimtsü ta osang angazüker.

Punjab aser Uttarakhand nung Congress lennirtemi Chief Minister nübo sayunür.

Parnoki taoba CM Harish Rawat aser Punjab Congress president Navjot Singh Sidhu na Chief Minister candidate sayunür. Saka Congress-i election jakdang telemsa madokdaksünür ta ashir.

Congress-i Punjab nung sorkar tashi ayutsü atema tayongzükba tulu ka ajurua lir. Maneni, parnok Uttar Pradesh, Uttarakhand, Goa aser Manipur nung BJP anema tashi itta tokteptsüla.

Uttar Pradesh dak alia Congress-i state asem nung BJP

den indangindanga tokteptsü aser Punjab nung parnoki Akali Dal-BSP aser Aam Aadmi Party den tokteptsü.

Uttar Pradesh nung Congress ya BJP den tongti tetokteper ka masü saka parnoki BSP den menden teimba ngunür.

Goa nung Congress-i timtem ka ajurua lir kechiyong Congress MLA aikati party toktsüogo. Taoba Chief Minister asem tashi Congress nung lir saka tang tashi parnoki CM candidate meshim lir.

Manipur nunga Congress-i tetsükdaksü ajuruogo kechiyong züngsem aikati party toktsür tanga nung denogo. Parnoki sorkar akümtsü tashi nguda taoba Chief Minister Okram Ibobi Singh nem maongka ka agütsütsü akok.

Congress-i Manipur nung temolung balaka agütsür aser senior observer inyaksü atema Jairam Ramesh shimogo.

Taoba Manipur assembly election nung Congress-i single largest party takok ngutetaka sorkar mekümtet.

PM Modi-i Covid-19 senden amen; Parliament staff 400 dak putet

New Delhi, January 9, 2022 (Agencies): India nung Covid-19 indang Omicron variant kanga putetba mapang ka nung Deobarnü Prime Minister Narendra Modi-i video conferencing ka ajanga senden menogo.

Covid tensa meyipa reprangshiba senden nung Prime Minister Modi-i sample tendangtsü, genome sequencing aser vaccine agütsü nungdaker ta nenshia metetdaksü.

"Testing , vaccines aser genome sequencing dena pharmacological maparen nung maneni scientific research alitsü nungdaker" ta pai ashi.

"Tainlonglong pur nem vaccine agütsüba maparen ya "mission mode" nung agütsü aser taruba anogotem Covid inyakyim akangkanga beshitsü atema temolung agütsütsü" ta Modi-i ashi.

Chief Minister tem den senden mena pei pei state indang osang agiteptsüla, ta

paisa shisem.

Iba senden nung Union Home Minister Amit Shah, Health Minister Mansukh Mandaviya, aser sorkar tongti ketdangsurtem aden. Senden nungsa railway board chairman aser Civil Aviation ministry secretary na aden.

January ita tatemlen nungisa Parliament indang Budget session tenzüker saka tesüiba anogo ishika tsungda Lok Sabha aser Rajya Sabha secretariats nung mapa inyaker nisung 400 jungnüa dak Covid-19 putetogo.

January 4-8 tsungda Rajya Sabha Secretariat nung staff 65, Lok Sabha Secretariat nung 200 aser allied services inyaker nisung 133 dak Covid-19 putet ta osang angazüker.

Deobarnü India nung nisung lakh 1.5 den teimba dak Covid-19 putetogo aser parnok züngsema nisung ajak agi 5,90,611 kümogo.

Deobarnep 9:00 ako tashi

nung tesüiba ghonda 24 tsungda India nung nisung 1,59,632 dak Covid-19 putet aser 327 asü, ta Union Ministry of Health-i metetdaksü.

Külen, India nung Omicron puteter nisung 3,623 kümogo aser parnok rongnung Maharashtra (1,009) nung teimba puteta lir.

Deobarnü Delhi Chief Minister Arvind Kejriwal-i yimti nung lockdown benoktsü tebilemba kecha mali ta shiogo.

"Nübertem nem timtem magütsütsü atema Delhi sorkari tenokdangba kar dang agütsünür" ta Kejriwal-i ashi.

Honibar tashi nung arishi küm 15-18 tsungda tainlonglong crore 2 tema nem Covid-19 vaccine dose agütsüogo.

January 3 nungi küm küm 15 nungi 18 tsungda tanur nem Covid vaccine agütsü arudang parnok crore 2 ser temai mezüngbuba dose agogo, ta Health Ministry statement-i metetdaksü.

Tanü nungi 'Precaution' Vaccine Doses agütsütsü

New Delhi, January 9, 2022 (Agencies): January 10, 2022 nungi India nung healthcare, frontline workers aser temang nung tanga tashidak aliba arishi küm 60 ser temapurtem nem Covid-19 vaccine indang "precaution doses" agütsütsü.

Honibar nungi booster dose agütsü atema tenüng zülüokba maparen tenzüker saka nisungtemi vaccine agidak arua tenüng agütsür agütsü akok ta health ketdangsurtemi shiogo.

Iba 'precaution' dose ya healthcare workers, frontline workers aser temang nung tashidak aliba arishi küm 60 ser temapurtemi dang agitetsü.

Vaccine tasembuba ya tanabuba dose agiba sülen ita 9 mesüra hopta 39 lir ang agütsü akok.

Taoba mapang agia aliba COVID-19 vaccine dang agütsütsü aser vaccine meyoaktepa magütsütsü ta sorkari metetdaksü.

Taoba mapang nai Covishield

indang dose ana agia lira 'precaution dose' atema Covishield dang agütsütsü. Covaxin agir alirtema kasa dang angütsü.

Temang nung tashidaktem-cardiovascular disease, diabetes, kidney disease, stem cell transplant recipients, cirrhosis, cancer, sickle cell disease, & other conditions.

Arishi küm 60 ser temapurtemi tang amshia aliba Co-WIN account ajanga precaution dose agütsü akok.

Tenüngji advance, on-site, mesüra Co-WIN Facilitated Cohort Registration ajanga zülüoktsü akok.

Co-WIN system nung zülüoka aliba ama dose tanabuba agiba anogo nung ajemdaker precaution dose agütsütsü.

Ministry of Health and Family Welfare-i Aadhaar dak alia tanga IDs agizükbatem:

1. EPIC
2. Passport
3. Driving license
4. PAN Card
5. Smart Card issued by RGI under NPR
6. Pension Document with Photograph

Precautionary COVID-19 vaccine dose agütsü mapang atongdang Co-WIN system ajanga SMS yoktsü.

COVID-19 nungi kümzüka ayutsü atema booster shots agütsü nungdaker.

Taoba mapang dose ana agiba ajanga temang nung timtem tuluba küma aotsüba nungi kümzüka ayutsü, saka mapang süia aodang tashimaitba akümtsü akok. Talisa teintet rogotem aser temang nung tanga tashidak alirtem dak taoba mapang vaccine agia aliba ajanga tashimait akümtgsü akok.

Külen, COVID-19 indang variant tasentem adokba nungi jenbua alitsü atema booster shots nungdaker.

Gari lendong nung nisung 1 asü, 3 yiru

Dimapur, January 9, 2022 (TYO): Assam kübok Lahorijan, Karbi Anglong nung Deobarnü gari lendong ka atalokdang nisung ka asü aser asem yiru.

Iba lendong ya Deobar nikongdang 2:00 ako meta atalok.

"Dimapur tsütsü nungi aruba truck gari kati tesülen nungi Maruti Ciaz gari ka dak atsük. Iba sülen truck gari jena aotsü



merandang ano Maruti Swift Dzire gari ka dak atsük" ta SDPO Bokajan, John Das-i ashi.

Maruti Swift gari nung Dimapur nung alir nisung pezü mena liasü aser parnok ajak yiruba sülen nisung ka asü. Tanüngbanisung asemji Dimapur nija mozü ki ka nung anepaludar.

Lendong agütsüba truck gariji (NL01G4494) Assam police-i Manipuri basti nungapu.

Mizoram nung osangbener hon jubilee mung tenzükogo



Aizawl nung Hokulbarnü Mizoram Journalists' Association (MJA) hon jubilee mung tenzükoba sentong nung taoba Mizoram chief minister aser MJA tentetsang tir Lal Thanhawla-i jembidang tangokba noksa ka yangi angur.

Aizawl, Aenjeti/January 09 (Agencies): Mizoram nung osangbener ajunga aliba tentet, Mizoram Journalists' Association (MJA) pur hon jubilee benjongmung tenzükogo. Iba tentet ya taküm March ita küm 50 ajungtsü.

Parnoki Hokulbarnü state tesem ajungalen jubilee mile tsüklokba sentong ka agi aser district MJA kari hon jubilee nungtem nung nungshilong azünga liasü.

Taoba Mizoram chief minister aser MJA tentetsang tir Lal Thanhawla-i küm tepiyong iba benjongmung tenzükoba Aizawl nung milen ka tsükloka liasü.

Iba sentong nung jembiba mapang Lal Thanhawla-i pa den osangbener ishikati 1972 küm Mizoram Journalists' Association tenzükoba indang bilemteta jemi aser tangbo Mizoram nung osangbener tentet ya kisüng lir, ta ashi.

Lal Thanhawla ya iba tentet nung tir akumba mapang pa ya

Mizo oshi nung Mizo Aw osangkaket indang yimo zülur liasü.

Iba mapang osang abenba indang junga memetet liasü aser tesüiba mapang osang kaket aika nung yimo züluba meliasü aser mapang kaka bendangradanga zülü aser nisung kar tenüng sena zülua liasü, ta tir mezüngbubai ashi.

Tesüiba küm 50 tsüngta Mizoram nung osang abenba tsütsü tenük agi ajiteta renloka aoba angudang pelar, ta Lal Thanhawla-i ashi.

Nüburtemi bilemba lemsatepba nung osangbener temi tongtipang shilem agir, anungji osang kaket ajanga Mizo oshi tali temaba jenjang nung ajungketa putu tasen nem angazükdaksütsü pai ajungshi.

"Mizü oshi ya takar aser tebur tajung süaka putu taseni junga mamshir. Osang kaket ajanga putu tasen aniteta parnok nem Mizo oshi shidak aser tajung amshidaktsüsüla," ta pai ashi.

District headquarters shiapei temeja osang kaket adokba den anogoshi Aizawl nungi osang kaket 30 jungnüa adoker, anungji nütüüng yongsük nung ajemdaker Mizoram nung osang kaket timtiba adoker, ta pai ashi.

Lal Thanhawla-i iba tentet asoshi mapa jenti inyakogo, ta MJA tir Zonunsanga Khiangtei iba sentong nung ashi.

Mizoram Journalists' Association ya 1972 küm March 23 nü tentet aser iba mapang Lal Thanhawla ya tir aser Hmar Arsi indang yimo zülur C Chhunbura ya tatong tir shima liasü.

MJA indang kimen mezüngbuba ya Lalbuai (Mizo Arsi) aser RK Pautu (correspondent, Times of India) ya tongti zülur mezüngbuba liasü.

Lal Thanhawla-i tir menden ya kümsük asem, 1972 nungi 1977 tashi bena liasü. Tang MJA nung züngsem 195 lir.

Iba hon jubilee mung ya March 23 nü Aizawl nung agitsü.

COVID mechi JP Nadda-i Tripura semdangtsü aliba athi

Agartala, Aenjeti/January 09 (Agencies): COVID-19 cases tali akumba mechi BJP tir JP Nadda-i January 10 nungi tenzükoba ananü Tripura semdangtsü aliba thiogo aser iba state nung tang yimsü tesüdak party ajanga anogo 15 atema lokti sentong ajunga thina atar, ta state party tir, Manik Saha-i Honibarnü ashi.

Anogo 15 sülen COVID tensa tanaben repringdangtsü aser iba sülen ang mera agitsü asoshi telemtetba agitsü, ta Saha-i ashi.

Tripura nung amungdang BJP tir ka ama Nadda-i state semdangba mapang lokti tentet balala indang senden aser sentong aika nung jembitsü liasü.

Health ketdangsur temi

ashiba agi, January 1 nü Tripura nung COVID-19 positivity rate ya shilem 0.69 liasü aser Hokulbar aonung shilem 3.09 kumogo aser kasa mapang active cases 94 aliba nungi 330 kumogo.

COVID-19 tashidak prokshia aoba azüoktsü mechi Tripura sorkari tenokdangba tasen kar benoktsü asadangba mapang lir.



January 9 nü Congress-i Twitter nung tetsürtem asoshi angadi bus service agütsütsü, ta ashi. State election atongtsü lia Hindi oshi nung tweet ka post sütsüba nung Congress sorkari tetsürtem timtem balala ajuruba nungi kumzüktsü asoshi parnok atema angadi bus service agütsütsü, ta ashi. Ajsüaka noksa ya BJP-i yimsü asüba Assam nungi liasü, anungji parnoki iba tweet ya indoka liasü.

Manipur nung Assembly elections atema renemshir

Imphal, Aenjeti/January 09 (Agencies): Election Commission of India (ECI) ajanga Manipur nung noklem ana lemsar Assembly elections agitsü anogo sangdongba sülen state nung political party temi election atema renemshi tenzükogo.

Manipur nung noklen ana lemdanger February 27 aser March 3 nü election agitsü.

ECI ajanga election anogo sangdongba atema state nung aliba party temi pelashishia agizükogo.

Manipur Congress ajanga nüburtem, party nung inyaker aser aruya aliba Assembly election nung tokteptsü tejangraba aliba lenirtem dang party office nungi from meshitsü metetdaksüogo.

Kasa mapang BJP-ia state nung unit ajunga dang ECI ajanga totuyuba agütsüba ama

senden aser nübuyim sentong ajak thina atatsü ashi.

Tang aliba Manipur Legislative Assembly indang kümsük ya March 19 nung tembangtsü aser constituency 60 (40 Gen ACs, 1 SC aser 19 ST ACs) atema election ya noklem ana lemsar agitsü.

February 27 nü mezüngbuba noklem nung Imphal East, Imphal West, Churachandpur, Bishnupur aser Kangpokpi district tem nungi assembly constituency 35 atema election agitsü.

March 3 nü tanabuba phase nung Ukhrul, Tamenglong, Senapati, Jiribam, Thoubal aser Chandel district tem nung constituency 25 atema election agitsü.

ECI ajanga election anogotem sangdongba sülen Manipur nung model code of conduct (MCC) tenzükogo.



Mangkolemba community health centre nung cabin ka danga maliba ajiteta Japukong Senso Telongjem Mangkolemba ajanga mezüngbuba cabin teyangludak lir. Nübur ajangzüktsütsü tangatetba nung mapa tajung inyakba ngua JSTM dang pelar, ta sangdong ka ajanga ashi.

Nisung ka apuba mechi Hajo nung nisung asem apu

Guwahati, Aenjeti/January 09 (Agencies): Crime Branch nung inyaker ama nisung asem arua nisung ka apuba sülen Hajo Police-i par asem ya puogo.

Par asem yagi tawa Hajo nung Muktar Ali ta sür nisung ka apu, ta police osang ajanga ashi.

Parnok yagi parnok ya Assam Police indang Crime Branch nungi ta ashi aser pa merenshia parnok indang van nung anir ao.

Par asem yagi pua bener oa alisanger kinunger dangi call sür sen 50,000 meshi saka parnoki jembitema sen 28,000 agütsü, ta ashir.

Pua bener aor temi Ali ya

chiokba sülen par kinungeri police dang iba tatalokba indang ashi.

Police temi bushisüngdangba mapang par asem ya Jalukbari nung ajurua AEC campus anasa ki ka nungi apu.

Parnoki par asem asüngdangyaba mapang parnok ya Dipjyoti Thakuria, Narayan Baruah aser Asmidul Ali ta jangjateta liasü.

Police temi parnok kabu nungi air pistol ka, pistol tail aka, walkie talkie ana aser sen kar nguteta liasü.

Ken o maneni bushisüngdangtsü atema police temi par asem pua lir.

Dibrugarh University nung COVID-19 cases 14 putet

Dibrugarh, Aenjeti/January 09 (Agencies): Assam nung aliba Dibrugarh University nung nisung 14 dak COVID-19 tashidak puteta liasü.

Dibrugarh University nung COVID-19 cases tasen 14 ya Deobarnü puteta liasü.

Kaketshir 14 dak COVID-19 tashidak putetba ya 'genome sequencing' atema sample tem yokogo, ta ashir.

Cases tasen putetba sülen tetsür indang hostel tenet tashi 'containment zones' ta sangdongogo.

Ajidang masü university campus shilem ka containment zone sangdonga lir.

Taoba mapanga iba university nung Africa nungi arua azünger kaketshir asem dak COVID-19 puteta liasü.

Tang Assam nung COVID-19 cases timba akumer.

Honibarnü Assam nung COVID-19 cases tasen 1254 liasü aser positivity rate ya shilem 3.73 liasü.

Cases 1254 nungi cases 472 bo Guwahati yimti aser temeket nung puteta liasü.

Welcome to STATE HANDLOOM EXPO

ORGANISED BY: NAGALAND HANDLOOM & HANDICRAFTS DEVELOPMENT CORPORATION LTD. (A Govt. of Nagaland Undertaking) DIMAPUR, NAGALAND.

W.e.f. 10th TO 23rd JANUARY 2022
At URBAN HAAT, DIMAPUR, NAGALAND
TIME : 10 AM to 5PM

My Handloom My Pride

NOTICE: PLEASE WEAR A FACE MASK FOR YOUR SAFETY

CM Sarma'er kinungertemi sorkar li atsünga agiba bushisüng dangtsüla: Congress

Dibrugarh, January 9, 2022 (Agencies): Assam chief minister Himanta Biswa Sarma aser par kibongi sensaker nem agütsütsüba ali acre 18 atsünga agiba atema Assam Pradesh Congress Committee (APCC)-i tai tongloktsüogo.

"Himanta Biswa Sarma-i pa menden alema 2006 nungi 2009 tsüingda sensaker nem agütsütsü aliba sorkar li RBS Realtors nem agütsü. Iba mapang pa Congress sorkar nung tashitait minister ka liasü" ta APCC spokesperson Manoranjan Borgohain-i ashi.

"Onoki Guwahati nung lungkak aitogo aser Assam Governor sorkar dang bushisüng dang asütsü takhangba agütsü saka ita ka süiaka mapa kecha meinyaker" ta Borgohain-i ashi.

Himanta Biswa Sarma-i aniba BJP sorkari sorkar junga ketdangsuba aser ochimashir dang taochi mesayutsü indang jembir saka par kinungertemi sorkar ali atsünga agidang ochimashi inyakogo, ta paisa ashi.

"Sarma-i pa tashi amshia Assam Ceiling Land Law 1956 alema inyak. Iba kimung ya fishery aser school yanglutsü atema lezmüksü saka atsünga agi aser RBS Realtors indang kimung ta melen" ta Borgohain-isa tai tongloktsü.

"January 10 nungi February 6 tashi APCC-i district shia nung iba onük atema osangbener sendentem amentsü aser bushisüng dang asütsü takhangba agütsütsü" ta paisa ashi.

"Anentsüh, tzümetsüng aser

tanga alima lendong balala nung ali mali akümbere sensaker nem ali yutsü saka RBS Realtors-i ozüng alema sorkar li atsünga agi" ta paisa metetdaksü.

2006 - 2007 aser 2009 nung Sarma kinungtsü director inyakdang RBS Realtors Pvt. Ltd-i ali acre 18 agi ta news portals anati shiogo.

June 2009 nung Sarma kinungtsü director menden yutsü aser shishilembar Ashok Kumar Dhanuka-i la melenzü.

Ajisüaka, chief minister Sarma den tesentaktep tajung alir Bhattacharya-i maneni director inyak arur.

Iba osangbener senden nung Dibrugarh district Congress president Debranjana Gogoi aser APCC member Rajkumar Nilanetra Neog na aden.

Babur, Aurangzeb aser Nizam nunger putiotsü nungi aitoktsü: Assam CM



Assam Chief Minister Himanta Biswa Sarma-i rally ka nung tanokba noksa nung angur.

Guwahati, January 9, 2022 (Agencies): Babur, Aurangzeb aser Nizam nunger India putiotsü nung mapang talangka malitsü ta Assam Chief Minister Himanta Biswa Sarma-i Telangana nung election rally ka nung ashi.

"Arrla 370 agienba aser Ram Mandir yanglu tenzüka ama Nizam aser Owaisi nunger tenüng aitoktsü aser iba anogoji tatonger" ta Chief Minister Sarma-i ashi.

Nizam indang senmang tatem kati arutsü aser kobi melii

Indian civilization nung amendaker sobaliba tasen ka tenzüksü, ta paisa ashi.

Mapang shia dictator ka Chief Minister mesüra Prime minister akümdang linük mesüra state nung emergency mesükba tensa ajurur. Telangana nung dictatorship mali akümtsü, ta Sarma-isa metetdaksü.

"Nai tanü jembiba ajanga BJP-i Telangana indang sentsüwangshi putiotsü aitoktsütsü merangba tebilemba sayur. Kechiba na aser nür

party-i India longjemtsüba kanga tsübur? 2018 nung Telangana indang obendang nungi bilemteter asü masü, iba mapang BJP-i menden 107 nung deposits akoksa" ta TRS MLA aser K Chandrashekar Rao'er jala Kalvakuntla Kavithayour-i Himanta Sarma nem o meyiptsü.

"BJP-i mapang ka Lok Sabha menden 2 nung dang takok angu saka iba tatishitsü tang nü jakdang lir" ta Himanta Biswa Sarma-ia langzü.

Assam police jawan ka ULFA (I) nung aden

Guwahati, January 9, 2022 (Agencies): Assam Police nung jawan kati United Liberation Front of Asom (Independent) nung denogo ta osang angazüker.

Assam Police battalion jawan Kaushik Gohain ya January 3 nungi samar bushitepa liasü. Pa ya Dibrugarh district kübok Jerai Gaon nungi lir aser Makum police station nung mapa lezmüka liasü.

Gohain-i ki toktsür aoba sülen anogo ishika lir Honibarnü

pa Myanmar kübok ULFA (I) tesep tongogo ta osang ajanga ashi.

Gohain tetsü (grandmother) anogo ishika temang mejungi aruba yashi asü ta osang ajangasa shisem.

Ano, Assam police jawan Nirmal Phukan-ia ULFA-I nung aden alitsü akok ta temolung malemer. Pa ya Silchar nung mapa inyak liasü.

Maneni, Tinsukia district kübok Talap Tamuli nung alir Pinku Moran ta ser lanur katia ULFA-I nung denogo.

Mizoram nung nisung 903 dak COVID putet

Aizawl, January 9, 2022 (Agencies): Mizoram nung Deobarnü nisung 903 dak COVID-19 putetogo.

Tesüiba ita ana tsüingda Mizoram nung nisung teimtiba dak COVID putetbaji tanü

asütsü.

Ajisüaka, taoba ghonda 24 tsüingda COVID dak sendakba nung nisung asüba osang kecha mali.

Tang tashi Mizoram nung COVID ajanga nisung 558 süogo.

Bokajan nung hon abener 2 apu



Guwahati, January 9, 2022 (Agencies): Assam kübok Bokajan nung nisung anati Rs 7.7 lakh alang hon bena aliba apu.

Osang tejangja ka angazükba sülen Khatkhati tesem anasa Guwahati-i aoba bus gari ka mita reprangdang tena apu.

Tena ya Manipur nunger Induwala Tongrang aser Ramesh Seram na ta jangjaogo.

Ramesh Seram apuba sülen honji Guwahati-i bener aoerba ta nangzü. Manipur yimtiba Imphal nungi honji bener aru ta pai ashi.

Tena mapa kecha meinyaker aser iba jagi item mapa inyaksüsa akümer ta police dang ashi.

Guwahati nung hon alizükba nisungi tena nem Rs 15000 agütsütsüba liasü ta Ramesh Seram-isa metetdaksü.

BJP sorkar kübok Manipur nung law & order mali: Congress

Imphal, January 9, 2022 (Agencies): Manipur nung Assembly elections agitsü mapang tonga arudang political party tem tsüingda tai tongloktsütepba tenzüko.

BJP-i aniba sorkar ajanga state nung law & order mali kümogo ta Manipur Congress-i tai tongloktsür.

"Biren Singh-i aniba BJP sorkari nangzüka ama kechiba AFSPA magienteter?" ta Manipur Congress general secretary Tilotama Loitongbam-i asüingdang. Manipur Congress-i parnok

indang election manifesto nung AFSPA agientsüba onük enoktsü metetdaksü.

"2022 nung Congress sorkar kümra mezüingbuba Cabinet senden nung state ajunga nungi AFSPA agientsü atema telemtetba agitsü" Manipur Congress lennir Ningombam Bupenda Meitei-ia ashi.

Yaküm December 4 nü Nagaland kübok Mon district nung 21 para special forces-i tai maketba civilian 13 khasetba sülen AFSPA agientsü ola tuluba adoka arur.



TIR YIMYIM

YIMOBILEM (EDITORIAL)

DIMAPUR TENTONÜ, AENJETI (JANUARY) 10, 2022

Tashidak wara sama matatsüla

Joko alima nung menatepa aoba tashidak tasen tasen poktetba ya yimya ka ama küma odagi, anungji mapa inyaksü atema asen alidak tashidak kenyongi mali sama atara, mapa inyaksüba mapang tajungbo, joko, kodanga marutsüa akok. Ibayongji, alima tensa mapang aser yimya mopong akhi yimya ama masü saka kenyongi balaka melenshiba agi asenok meimchir inyakyim aser libalirua kenyongi balaka melenshi aotsüsa kumogo. Aji oda, tang asenoki ajangshiba mapang ya akhi yimya ama 'normal' masü saka balaka 'abnormal', ajsüaka balaka tamajung mebilemi asenok joko libaliru yimya tasen ka nung lia aotsüsa akümer ama bilema aotsü atema, tang tensaba ya 'abnormal' masü saka 'new normal' ta agir. Iba jagi asenok nem tangatetba tasen aser tajung ka agütsür. Joko, alima nung nisungtem shisarenlokba agi nisungtem nungdak tapu tapu yangluteta inyakdang, alima tzü mopong tatsük küma menendaksür. Iba jagi, nisungtemi asaa tashidak wara yanglua mepoktetdaksüyonga, tashidak tasen aika poktetter. Ano, nisungtem atema timtem lendong ajurutsüba mapa kaji, alima kintem tashi toktep dang raratsü sentong tapu balala yanglur aser item rongnungji mim mopong agi tsükchirtem sädaksütsüsa raratsü asoshia dena renemteper. Iba jibo alijak nung talir ajak samatsüba mapa lir. Iba amaji ka ataloktsüsa mapang aru nungbo, idangjibo tanü asung asenok Covid aser Omicron tashidak mesen nokdangtsü atema sü mask agiba ya masü saka electronic oxygen mask agir senzütsüsa akümtsü. Item ajakji matalokia ataloktsü ama bilema nisung ajaki pei kiji tanurtem asoshi kaketreju aser tenla ki ama bilema libaliru yimya tasen ka tenzüksü nungdak kumogo, Kasaji, lendonga liang teli, taküm alitsü asoshi chiyongtsü nungdaker aser chiyongtsü angutsü atema alubosa ayimtsüla aser alu mayimertema jangotsü alitsü atema langkabosa inyaka sen aatsüla. Tetezü, kimalen mopong nung temenatetba tashidak bener jajadagi ta ser tanurtem kaketshisatsü mebushitsüa masü aser asenoka mapa meinyaksüa masü. Tanur-a aser tain-a pei mapang nung pei teinyaksübo inyaksüla, kechiyong tashidak wara liang teli, küm aser mapang agibo asenok matatsü. Aji oda, iba ama putu yimya tasen ka nung asenok ali tenzükdang, memeteti iba libaliru yimya tasenba yagi kibong kar alar jenjangi ludaktsütsü aser karbo jenjang tajungba kati tur alitsü. Iba jagi angatetsü atema, asenoki asen tanurtem rongnung taintem peisasa zülutetter aser züngtettertembo ken toktsür, 2020 küm, küm pezü junger kaketrejui aotsü tenzüksü purtem, kaketreju junga mangu ser tang class 1 nung amener, kechiyong kaketshidaki maoyonga kidang lia online class agiogo. Ajsüaka, tanurtem rongnungji kidang tsüraburtemi parnokang tesayur kümer sayurtem o mesayurtem na tsüngdang ongdang talangka adokadoktsü. Iba amaji, tashidak wara agi senzusenponga mesademji ta ser kidang dang kazüa amongertem o yimti nung nisungtem den külemi ali majungji ta ser alu nung aser pei mapa inyakdak lia mapa rateta inyakerter rongnunga tepila talangka kumadoktsü. Aji oda, asenok akhi libaliru yimya nung alir masü libaliru tasen balaka "new normal" nung alir asünungji, joko asen ki agi school aser tenla ki kümer tanurtem dang alima shisatsü aser tanüla chiyongtsü agütsüsbaji tanü putu inyakyim tasenba asütsü. Iba denji külemi, joko alima mapang aser mopong agi nisung aika adenshia mapa inyaksü mesademi akümer asünungji, asen kijai kechi mapa tajangzük lia inyaktettsü ta bilema libaliru inyakyim tasen tenzükba den külemi asen inyaksüba mapa sentonga putu yimya tasenba den putepa sentong tasen tenzükba inyakra, asenbo tajangzük keta inyaktetba mapatem nung tanishir akümtsü. Alima tashidak wara agi mapa inyakdak, kaketshisatsü angazükdak aser Tsüngrem külemdak ajak shibanga ayuba agi asen dang kaketshisatsü tebushi, mapa teinyak aser Laishibaa tebushi aser sarasadema tesü ta ashirba masü saka inyakyim melenerba dang, anungji iba inyakyim tasenba nungji asenoki otettsüla. Alima nung nisunger libaliru aser inyakyim ya alima ali tashi tasen-tasen melenpet melena aotsü aser shiri iba ama temelenshi tasen aruba den putepa sentong atonga otetdir, parnokjibo alima nung tashidaka mali ama jangratema tajungba tajungba lia otettsü. Tang ama alima nung tashidak wara poktetba ya tasütsü wara masü saka alima nung meimchir libaliru aser inyakyim melenba 'new normal' tenzükba mapangang ka ama bilema asenoki inyakra, asenok asoshibo, ibai, temelenshi tajung ajuruba temoatsü mapangang ka asütsü.

OLEMSABANG

LOKTI TAKÜM NUNG OCHIMASHI TEMENEN: AROGO TEINYAKTSÜ

~ Limasangwa

YSS nung "Lokti taküm nung ochimashi temenen: Arogo teinyaksü" onük nung September 24, 2021 sensaksem aka. Shilem ana küma lemdanger lenir anati jembir. Rev. Dr. L. Kari Longchar-i lokti taküm nung ochimashi temenen indang jembir aser Dr. Imlirenla Walling-i lokti temenen yanglushiba nung arogo shilem indang jembir. Tali aroka bilemdangtsü asoshi yangi tongmelang agi tejembiba lemsar.

Lokti taküm nung ochimashi temenen: Dr. Rev. L. Kari Longchar

Zephaniah ainkar mapang lokti nung teraksa tesüngmangtsü ka adokbaji tanitakertemi raksaba masü saka tanishirtemi raksaba ajanga liasü. Lenir, putir aser yimsüsürtemi rishikangshiba ajanga nüburttem tesünep meli-i aküm. Arem nung aliba molusongzü ama parnok tasa tamajung nung nüburttem timtemi yok. (Zephaniah 3:1ff) Iba tia den medemdangra tanü asen lokti tia kasaji lir. Yamai dang ola matoki yutsü nungbo, asen chirnur aser semchisemnurtem asoshi aiatai mapang ajurutsü. Tanü ozüng raksartemi yimsüsüba mapang ka nung alir asünung, tesem ajak nung shirangba ola angashir.

Raksaba ya aluyimertemi/yimtaklirtemi masü saka temaba jenjang nung lenirtemi nungi raksayonga aruba angur. Tesasatsüka asen lima nung ochi inyakba asadanga yamai shitettsü: Nüburttem 90 shilemji ochishir saka, yimsüsürbo 100 nung 5 shilem kati dang ochi meimer. Yamala yimsüsüba mapang ka nung koda sür alima tiptema alitsü? Leniri anir raksar nung koda sür melenshitsü? Tanü arogo, kibong aser shisaliok riju ajak ya ochi shia inyaksü sayuba lokti tentet kaka sütet nung dang item telok jagi ochi shia inyak nung dang ochimashi temenen ya koktettsü.

1. Lokti taküm nung ochi mashiba temenen

- Lokti tentet aser kija kibong khenyongi raksatsüba tashiji Election ya ka lir. Iba ajanga asenok tamanger ayak khenyongi raksaba asenoki küm piyong ochi sayua arubato amajok kümtsür. Yimsüsürtem shirnok ket nung alima yanglutsü tashi lir parnok ochi nungi pila aoba mapangji election mapang ya lir. Iba mapang nung yimsüsür tajungtem ishikajia (5%) ayarterm nung amokmerena adoker asü nung ola madoktetit tamajungertem den sakuku akümer.
- Alima nung terenlok bener arutsü asoshi tashi akartermji office nung amener tulurtem ya lir. Saka perangpong bener arua amokmerenba ajanga ochi meimba lenirtem-ia tepang melapoktetit tiyazü mapa nung külemi ochi mashiba temenen benshitsüsa akümer.
- Public leadertemi parnok tsüngda nung tajungertem mesüzüka onoki abentsüar, na tai mali-ar, ta mesüzüka nüburttem asoshi terenlok mapa songtema ayuba.
- Mapa ka inyak nung meinyakba taah shilem (percentage) balala meshir. Süra koba sen agi mapa inyaksü.
- Ochimashi tentenzükdakji State government ya lir. Mapa ajak nung pei ajungtsü tebilemba nung dang inyaker asü nung, alima terenlok asoshi rongsen aser mapa ajak ochimeshi-i inyaker. Yimtsüng nung aibelenbaji temaba nungi aibelenba ajanga lir.
- Tanü grass root nungi tera junga yanglua atutsü saka temaba menden nung ajakji raksatsür.

2. Ochimashi adokba tera (root)

- National workertem ajanga tashi amshitsü agütsü nung yimsüsürtena tamajung nung tasü itaktsüba.
 - Pangdak amertem shirnok dak ochi inyaksü tashi lir, parnoka telung nung alirtem den amteper inyakba.
- ### 3. Ochimashi temenen taah (wages)
- Nagaland nung High Court office, Airport, Medical college, Kohima to Dimapur four lane, District lenmangtem, Yimtsüng lenmangtem, Government hospital, aser schooltem temeimtsü jenjang nung lir.
 - Foot hill lenmang koda? 30 crore aruogo. Yabo civil society inyakerji terabo teimla lir, saka asen lima nungbo kecha meteta maka.
 - Ochi obendang angutsü ata aliba ken o (case) aika nempanga yuja lir.
 - CBI, RTI, Lokayukta item lemang balala agi tanga state nungbo ochimashi mapatem bushiteta tapet temerenshi agütsür; saka ochimashi lenirtemi parnokji alizükadok nung nüburttemsa akoksa-a lir.

Teinyaksü

- Mokokchung District nung coordination monitoring cell ka yimtsüng shia nungi bendanga agütsüba nisung kaka shimteta Mokokchung district nung sub-division shia coordination cell kaka tentettsüla. Iba telok ajanga Nagaland nung department ajak (77) nung mesüaka, ishika nung dang sen koma bendener, entoker aser tajangzük koba lir parnoki osang tejangja agütsütsüla.
- Tribe ajunga nungi temaba tentet temang ka (highest body) teyakyak aser tetangshi ishika alitsü aser item jagi mita repringtsü. Yamaji süra state government mesüra linük tenzükter ajakji merüktettsü. Anaji merüktetra asen lima nung tesünep aser yimjung atoktsü. Tebilemdangtsü: Nagaland koba Khristan teimba aliba state lir, ya tang tashi nung tajung jenjang asadanga nung 20 buba lir. Shitakba agi asenok ya mezüngbuba asütsüla. Anungji kin ajak dang ochi aser teindang ta sayutsü asoshi asenok ochi jembia asen nübör azüoktsüla.

Lokti taküm nung Arogo teinyaksü: Dr. Imlirenla Walling

Arogo ya ochi nung azüitba, noktakba tamangertemi akümba lokti tentet ka asünung, temenen anema inyaksü asoshi tanga lokti dang nungi tashi tuluba ka lir. Arogoi shilem agiba ajanga dang asen lima nung ochimashi tashidak ya samadaktsütsü akok. Anungji ochi mapa inyaka alima süneptsütsü asoshi arogo khuret tulu lir. Temelenshi ajak arogo nungi atoktsüla aser arogoi iba khuretji angateta inyakra, asen lima sünepa alitsü.

1. Lokti taküm nung arogo teinyaksü pezü

- Mezüngbuba nung Lenir shimyim: Arogo nung tenzükter shimba nung tejak repringa bensabenria meshimtsüla. Kechiaser bendanga agütsüsbaji tenzükter ka mezüng qualificationji lir. Ochi tenzükter adoktsü asoshi arogoi mezüngbuba nung taküm libaliru nung asüngteta aliba aser mangdang aliba shimtsüla (Clean and visionary in leadership). Yimtsüng nung talisa nübo malia ta sür temesepba chiyungtsü achi ajemer mesüra nüktapangta benshirtem meshimtsüla. Akhi yimya abenba, melenshitsü mejangraba lenir (Traditional leader) mesüi joko tensa angateta lenitsü angatetba lenir (contemporary leader) shimtsüla. Akhi mapang inyakyim nung akhanga ameter inyakba ajanga tanü talisa lanur taküm aika para churches nungang oa adener asü nung, kibong nung lirumedem tamang aiben makateter.
- Tenzükter ka taküm: Tenzükter kaji ajak asoshi tatishitsü aketba taküm ka asütsüla (Role Model). Mahatma Gandhi-ia ashi, "My life is my message" kasaji, lenir ka libaliruji pa/la sabang nungi jembiba onük dang nungi tongtibangba. Tenzükter kaji sadok sadoka (comfort zone) aliba inyakyim nungi adoktsüla. Tat. agi, tesem onsara tulu asünung ajak dangi mouteter, anungji akok tashi sabang nungi Tsüngrem Oji tajungba anganüdi ta asüba nungi ya kü shilem ta angateta nübör tia asadanga nungdakba pur tongtettsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerit angateta agitsü mepishir

Kenya nung Muslim nungertemi Khristanpur trok tepset

Nairobi, Aenjeti/January 09 (Agencies): Somalia nungi telungpur südi ta temolung melemer densema Kenya nung Muslim yimsü kanga metsünga-reta amshirtemi Kenya southeastern tsütsü January 3, 2022 anepdang 1:00 ako nungi 3:00 ako (par mapang) tsüngta Khristanpur nisung trok tepset, ta osang ka ajanga ashi.

Somali telungpur telok, Al Shabaab nung züngsem temi yangji aliba Muslim extremist tem den külemi Kenya tzükumlen Lamu County kübok Widho, Majembeni Mpeketoni nung lendong ya agütsü, ta yangji alirtemi ashi.

Lendong agütsürtem ya kar Al Shabaab aser danga Islamic sübütsü sübur arua ajaki kanga junga meteta aliba Khristanpur coconut tetong ayoker Francis Kaburi apu aser pa January 2 anepdang 7:00 ako meta süngdong nungi aludaktsü, ta tepseter aliba danga Khristanpur ka kinungtsü Joyce Wanjiru-i ashi.

La kinungbu Joseph Mwangi Maina ya pua bener ogo aser pa takum lendong nung lir aser pa den ano Khristanpur asem pua Widho nung aliba John Murimi indang dokan nung yua lir, ta Kaburi nungi January 3 anepdang 1:00 ako meta call ka ajanga ashi, ta lai ashi.

Murimi, Peter Maingi aser Peter Musyoka nunger ya dokan nung sarasademtsü adenshia lia telungpur temi apu. "Iba sülen call ya anen. Ajisür dokan nung mi senloktsü aser par asem yangji asü," ta Wanjiru-i Morning Star News dang ashi.

Anepdang 2:00 ako meta lendong agütsür ya Mwangi Maina'er kidangi aru, ta pa kinungtsü Wanjiru-i ashi.

"Kaburi-i kü kinungbu dangi call asü aser ki yutsür aotsü ashi. Pai kishi lapok aser kimai ao," ta lai ashi.

Somali oshi aser Kenya nung bulua jembiba Kiswahili oshi nung lendong agütsür temi Mwangi Maina den asüngdangya asü aser pa Islam dangi meyiptsü memolung ta merenshi, ta lai ashi.

Somali nunger masü, Mwangi Maina ya Kenya nung Khristan ka ama mesütet aser küm tenet jakdang Islam dangi meyip, saka küm ana lir Khristan dangi tanaben meyip, ta lai ashi.

"Pa Muslim akumtsü memolung, aser tsükchir asünung tamangba yimsü tamajung indang sangdonger ta parnoki pa merenshi. Ajisür pai parnok dang pa metepsettsü mepishia liasü, aser pa nunga aser ola tulu adoka asatena

liasü. Tanurtem ola tulu adoka ajep tenzük aser parnoki onok kilung nungi adokdaksü," ta Wanjiru-i ashi.

Muslim extremist temi lar kidang mi senloktsü aser lar tanur arishi küm 15, 12, 10 aser 4 tain jena ao, ta lai ashi.

"Kü kinungbu tekolak tangzüka pa terongrong nung yuja liasü," ta Wanjiru-i Morning Star News dang ashi.

Iba tesem nungi lendong agütsürtem ya Murimi'er kidangi ao, shiba Kenyan Khristan ka shiba dokan nung mi senloktsüba mapang asü. Par kidang nungi Murimi kinungtsü Grace Wanjiru aser par tanur pezü, arishi küm 12, 10, 8 aser 2 tain kidang nungi anizük aser kidang mi senloktsü, ta osang ajanga ashi.

Lendong agütsürtem ano Somali nunger masü Khristan, Maina Jigi'er kidangi ao. Muslim extremist temi anepdang 2:30 ako meta par kidang mi senloktsü aser yangji Jigi rongset, ta yangji alirtemi ashi.

Iba sülen parnok Kaburi'er kidangi aru aser par kibong jena orr liasü, ta Joyce Wanjiru-i ashi.

"Anepdang 3:00 ako meta Kaburi'er kidang mi janrua liasü. Onok Widho nung aliba police post bushia ao aser tasüngji Kaburi temang majiteti rongsar par ki telung nung ngutet," ta lai ashi.

Mwangi Maina aser Murimi nunger ya Redeemed Gospel Church nung züngsem liasü. Tanüngba Khristanpur pezü tepsetba ya Pentecostal Evangelical Fellowship of Africa nung züngsem liasü, ta osang ajanga ashir.

Motorcycle densema Kaburi indang osettsüset ajunga raksatsü, ta security force den lendong atalokba tesem tonga aoba Morning Star News ketdangsür temi ashi. Khristanpur dak dang tenük yoker lendong agütsür, ta yangji alirtemi ashir. Ki pungo rongdoktsüba nungya ka dang Muslim nunger indang liasü, shiba Khristanpur den tembar liasü, saka tanüngba ki ya Khristanpur indang aser Khristanpur dang tepset, ta yangji alirtemi ashi.

"Muslim nunger shinga metepset; iba lendong ataloktsü atema parnok nem osang agütsür liasü, anungji parnok lendong atalokba tesem nungi ainshir liasü," ta ketdangsüri ashi.

Kinunger takum samar alirtem taoksakang, talidak ki maka, chiyongtsü aser aben süoshi mali lir, ta lai ashi.

"Tensa kanga majung lir, nübürtem tetsübu nung lir aser aika Widho tesem nungi jenogo. Imlibilema iba lendong agi kongshir alir asoshi sarasademjang," ta ketdangsüri ashi.

ANO GO ABEN TSÜNGREM DEN

Ne tesangwa tali tesangwa akümer asü ?

Saka temeshipur lenmangji anüpfung sangwa ama lir, kobai anüngdang matong tashi, tali sangwar. A. Shin 4:18

Apijemtsü Shin kaket zülur, Solomon shisa takatiba chuba liasü. Iba shisatsü kaket yagi temeshi taküm aliba tajangzük lemsateper aser shisa taka tamashi nisung den medemdanger aser temeshi nisung temenen nisung den medemdanger. Yangi pai ashir, "Tashi temetet tetenzükji ya; Tashitemetet nguang; aser nai kechisa ngudir nguaka tangatetba nguang" (t.7). Pai ashiba tetezüji kati shisatsü, pai/lai ibaji maka aser aji pai/lai nüngdaker ta angatetsüla. Tamajung pur lemangji ammag mesüka lir saka temeshi pur lemangji tesangwa lir (t.19). Nai anepdang anü adokba reprangra, idakji tamang lir, kodang züngya kümdir tesangwa tera yaloktsü aser anü jangja adoktsü aser anogoji maneni tesangwaba, tesangwaba akümtsü.

Iba amaji temeshipur dak ataloker. Atangji asenok shinga pei sasa temeshi mekümtet, saka nai aser ni Kibuba Yisu tenüng nung jara, asenok Pa temeshiba akatsü. Asen mera shiaji tejangjaba akümtsü kechiaser asenok lemang nung Pa asenok den jajar, asenok taküm anir. Timtem tuokrong tia ajanga Pa asenok den lir ta asenoki metet aser Pai asenok asoshi tajungtibaji bener arutsü. T. Ken 119:105 ji bilemtetang, "Ne O kü tsüng asoshi milen, aser kü lenmang asoshi tesangwa lir." Asenoki Pa O asenok taküm nung mungdaktsüra asenok koda temulung süa alitsü.

Oba, tanü kü tesangwa agi Na tushitsü aser sentsüwangshidaktsütsü kü dang yariang ta mepishir. Amen.

Yisu-i sayuba ni agizükteter: Elon Musk



Aenjeti/January 09, 2022 (Agencies): Tesla Co-founder aser CEO Elon Musk-i tawa The Babylon Bee website den sensaksemba mapang pai Yisu Khristan aser tamangba

yimsü angatetba indang lemsatepa liasü. Bee yagi timba asayamenü atema sensaksem akar, saka Musk den sensaksemba yabo kanga süoki ia Yisu Khrista ajanga teti tatem maka

tekumtet anguba indang aika lir, aser item tesayuba ni jembia liasü. agizüker," ta langzü.

Sensaksemba mapang "Tenük melen tenük ta SpaceX entrepreneur yagi masü nü tenaba (cheek) Christian website indang tendaktsü amala ashiba ya CEO Seth Dillon, Editor-in- kanga tongtipang lir. Tenük Chief Kyle Mann, aser melen tenük agütsüba agi ajak Creative Director Ethan nükboker kumdaktsür," ta Nicolle nungeri asüngdangba Musk-i ashi.

"Tatok agütsüba tongtipang aser nai aginüba aser takatait indang jembia ama dangar anepaluba. Pei liasü. Sensaksem tatemlen ama pei anasa alirtem Musk-i Deobarnü meimang," ta pai ashi.

"Saka Yisu-i nisung asayamenü Bee indang kumzüker asünungbo ni Pa editor tem dang sentepi lenmang nung menokdaktsü. maoba asoshi molumi-i aotsü, Pai ni kumzüksü," ta Musk-i ashi.

Pai baptiner asü ta pa dang asüngdang dang, tanur asüdangbo baptinüa liasü, ta Musk-i langzü. Tsüngrem,

"Babylon Bee ya Khristan lokti tentet ka lir aser onok ya ministry ka lir... Iba arogo indang shia aliba aika yanglutsü atema naia Yisu ya metetnüba lir, ta pai ashi.

nü Tsüngrem aser 2020 küm Dragon Capsule Kuntetdakba ta agizüker takok ngua Gulf of Mexico asü? ...Nü Tsüngrem aser nung alua anenba sülen, Tekumzüker," ta Nicolle-i Musk-i iba mission atema ashi. sarasadema liasü, ta ashi.

Musk ya second ishika "Ni kanga tamangtir bo süngmanga amen aser "Yisu-i masü, saka ni iba atema i sayuba ni agizüker. Yisu-i sarasadem," ta Musk-i shia sayuba nung shisatsü tajung liasü.

OLONG PAITEP # 6046

1				2				3		4
5		6								
							7			
8										
										9
		10					11			
				12				13		
14										
							15			
16										

- | | | | |
|------------------------------|-------|-------------------------|-------|
| TIPILEN | | LANGTSÜNGLEN | |
| 2. Auo nung chiyongsü asenba | - (7) | 1. Lenmang | - (7) |
| 5. Mangyimba mapang | - (5) | 2. Aor kidong ka tenüng | - (6) |
| 7. O tamendakdak | - (4) | 3. Tenarong maten | - (6) |
| 8. Pei dak malangba | - (7) | 4. A _ _ _ g | - (3) |
| 10. Juli | - (7) | 6. Mopung apodoka | - (3) |
| 12. Sen ayudak | - (7) | ola adokdaksüba | - (3) |
| 14. Tenük agi ajitet | - (4) | 9. Tongtipang tagitsü | - (7) |
| 15. Tamajung aküm | - (5) | 10. Menungra bilem | - (6) |
| 16. Apuso | - (7) | 11. Aiür | - (6) |
| | | 13. S _ _ _ k | - (3) |
| | | 14. T _ _ _ r | - (3) |

OLONG PAITEP # 6045 TELANGZÜBA

- | | | | |
|-----------------------------------|--|---|--|
| TIPILEN : | | LANGTSÜNGLEN : | |
| 1. Yiar, 3. Tesola, 7. Yimra, | | 1. Yimti, 2. Amen, 4. Shiner, 5. Alaka, | |
| 8. Tangar, 9. Peria, 10. Tanur, | | 6. Satan, 9. Putet, 10. Tembar, | |
| 11. Tasen, 13. Lemjem, 15. Tambu, | | 11. Tatok, 12. Amang, 14. Jala. | |
| 16. Khuret, 17. Sang. | | | |

2022 KÜM TONGTIPANG TEINYAKTSÜ KAR LEMTETBA (RESSOLUTION)

Sati benjong mapang :
Tenla kidang Sati kulizüng agir lokti benjong chiyongsü mena alidang mapang talang ka mintoktsü. Akok tashi tatsütiba nung mapangji agia meshiteta sarasademer benjong chiyungji tenzüksü....ta telok ajaki akangakanga bangzünga ayur.

Asü-pila sentep nung :

- Asü pila sentep nung nisung aikati melentepa o shilo mejembitsü akangakanga bangzünga ayur.
- Drug addicted/yi agi jemseta asüba sernung tsürabur/adianui telok dang pa/la kodaki ogo ta jakdaka numadanga jembiba ya melenshitsü akangakanga bangzünga ayur.
- Tasür kidang aonung tasümang nuka ken tena kazüdang kinuk-kisang ajunga nung asatepa yi jemtepa kazütepba ya 2022 küm nungibo mebenshitsü akangakanga bangzünga ayur.

Tenla kidang Pulpit nungi :
Tsüngrem o jembidang telok peladaktsütsü asaya-menu olen kar ashidang maya-koya o maksutsü o agi asaya menu masütsü ajangajanga bangzünga ayur.

- Lilir- L.Kika Pongener.

TANÜBO NAI LANGZÜANG

Q. Tawa, Japan-i koba linük den 'Reciprocal Access Agreement (RAA)' sign asü?
 [A] USA [B] Australia [C] Brazil [D] Russia
 _____ (Taruba adok nung onoki langzütsü)
YASHI ADOK TELANGZÜBA : Chile

AO OSHI ANGAZÜKDAK:
TANÜ ANGAZÜKTSÜBA OJANG

Ma
 (v) memulunger, magizüker (no)
 * Medemertemi mapa tamajung inyaktsü ashi dang, ni' **ma** ta ashir.

Maben
 (v) mabensa, matong (fall short)
 * Kiburi ayanger nem sen **mabensa** agütsü

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA



2011 küm January
 10 nü Argentina
 nunger Football
 asayar Lionel
 Messi-i FIFA Ballon
 d'Or takok angu

SUDOKU # 6086 TELANGZÜBA # 6085

7		4	2	1			3			4	2	3	5	7	8	1	6	9
2		3			5		1	4		8	9	7	2	1	6	4	5	3
6	1	5	3	8			7			5	6	1	9	3	4	8	7	2
8		1	7		6		4	9		6	3	8	7	4	5	9	2	1
		6	1			5				7	4	5	1	2	9	3	8	6
	4			9	3	2		1		2	1	9	6	8	3	5	4	7
4			9		7		5			1	8	4	3	6	7	2	9	5
		2			1	4	9			9	7	2	8	5	1	6	3	4
	5				8					3	5	6	4	9	2	7	1	8

OJANG LUTEP # 5632

- ENASI :
- PAMA :
- JUNTAG :
- INYETDAAKTNG :
- PAMA :
- AJUTAMNG :
- KAAI :
- DAMAK :
- KOTAK :
- GUANR :

OJANG LUTEP TELANGZÜBA # 5631

TEMELENSHI ATEMA SAYATENYA BALAKA MARUTSÜ SAKA
 PEI DAK TEMULUNGTETBA ALITSÜLA

TAN HOPTA ATEMA - KOMA SÜLA ?

Q. Naga yimten tebilemtsü ya tatem küma melatettet tashi, Nagaland nung India temzüng kübok agiba election kata magii ata nunga koma süla ?



New Delhi, January 9: Ato Kilonser Narendra Modi-i Deobarnü linük nung Covid wara asadangtsü atema tongtibang ketdangsürtem den senden ka ayongzüka amenba mapang tangokba noksa nung angur.

Parliament staff 400 shi dak Covid tashidak potet

New Delhi, Aenjeti/January 9 (Agencies): Lok Sabha aser Rajya Sabha secretariats aser allied services tem nung inyaker nisung 400 shi dak anogo ishika tsüingda Covid-19 tashidak potetogo, aser iba ajanga employees tem office-i marutsü tenokdangba agütsüogo.

Sources ajanga ashiba agi, Rajya Sabha Secretariat staff 65, Lok Sabha Secretariat staff 200 aser allied services staff 133 dak January 4 nungi 8 tsüingda Covid-19 tashidak potetogo.

Parliament Budget session amentsü lia tang staff tem dak tashidak potetogo. Budget session ya yimya agi January tatemlen tenzüker.

Staff tem dak tashidak potetba sülen Rajya Sabha Secretariat-i, ketdangsür aser

staff tem office-i arutsü tenokdangba agütsüogo.

Tetuyuba tasen agütsüba nung under secretary mesera executive officer indang rank kübok aliba staff tem shilem 50 iba ita madem tashi pei kidang nungi dang mapa intaktsü tuyuogo. Item staff tem ya employee ajak senteper shilem 65 asütsü.

Rajya Sabha mendenbuba M Venkaiah Naidu-i tensa asadangogo aser Budget session matong tsüingda ketdangsürtem aser staff tem yongtsü nung tashidak menatempa aoba nokdangtsü atema jenjang tapet agütsü tetuyuba agütsüogo.

Matamabensarter aser mashisa aliba tetsürtem pei kidang nungi dang mapa

inyaktsü temelaba agütsüogo. Kasa mapang nung nisung tali nongtepba nungi jenboa alitsü atema secretariat lapkba aser shibangba mapang dena melenshitsuogo. Official sendentem ajak virtually dang agütsü tuyuogo.

Naidu-isa, ketdangsür aser staff tem ajak dak coronavirus tashidak tendangtsü aser shiranga alirtem kanga junga asadanga alitsü aser nungdak sera parnok temang anepaluba aser mozüki nung munga temang anepaluba mapang teyari agütsü tuyuogo.

Maneni Lok Sabha Secretariat-ia, under secretary rank kübok aliba staff tem shilem 50 dang melentepa office-i arutsü tuyuogo, koba director temi telemtetba agütsü.

AAP-i Goa election atema candidate list tanabuba sangdongogo

Panaji, Aenjeti/January 9 (Agencies): Arvind Kejriwal-i aniba Aam Aadmi Party (AAP)-i taruba Goa election atema candidate ter tenüng sangdongogo. Anogo ana tejakdang candidate 10 tenüng sangdongba sülen Deobarnü ano nisung 10 tenüng sangdongogo.

AAP indang Goa incharge Atishi-i sangdongba list nung Goa convener Rahul Mhambre densema lir, shiba Mapusa nungi tokteptsü aser pa den Cruz Silva aser Cecille Rodrigues nata Velim aser Taleigao constituency tem nungi tokteptsü. Tenaprongla 2017 küm assembly election nung AAP ticket nungi toktepa

liasi.

Tanga candidate tem rongnung taoba BJP züngsem Ramarao Wagh (San André) aser Sudesh Mayekar (Calangute), Rajesh Kalangutkar (Maem), Prashant Naik (Cuncolim), Anoop Kurtadkar (Canacona), Anil Gaonkar (Sanvordem) aser Sandesh Telekar (Fatorda) nung densema lir.

"Goa nung election nung tokteptsü atema Aam Aadmi Party renema lir. Ni candidate tem tanabuba list pelashishia sangdonger aser item lenirtem yagi yimden yimsüsüba nung temelenshi bener arutsü," ta Atishi-i ashi.

Anogo ana tejakdang AAP-

i candidate tem mezüngbuba list nung nisung ter sangdongogo, kong taoba mapang BJP minister Alina Saldanha aser Mahadev Naik den tanga lenirtem densema lir.

Mezüngbo AAP-i election nung tanga party den longjemer tokteptsü ta ashi, saka kija dang tokteptsü telemtetba agiogo.

Goa nung February 14 nü Punjab aser Uttarakhand na den külemi election agütsü.

Kasa mapang nung independent MLA Prasad Gaonkar-i Deobarnü mapa toktsüogo aser pa Congress party nung adentsü imlar. Congress-isa taoba Goa BJP indang youth wing lenir Gajanan Tilve pelashishia agizükogo.



India nung yangluba mezüngbuba aircraft carrier (IAC) Vikrant maneni tendangtsü atema Deobarnü apusogo. Iba rong ya August nungi tenzüka amshitsu sentong lir.

CG-i Pak nunger rong ka apu

Ahmedabad, Aenjeti/January 9 (Agencies): Indian Coast Guard (ICG)-i Gujarat tzüküm nung Pakistan nunger rong ka nung nisung 10 mener lia puogo, ta state defence otongdar kati Deobarnü ashi. 'Yaseen' rong ya Honibarnü aonung ICG rong kati apu, ta ketdangsürisa ashi.

aliba ngutetogo. ICG-isa, rong nung mena alirtem ket nung kuli kaket kecha maliasü, ta ashi

Coast guard tekolakba V S Pathania-i, Pakistan den arrtsü nung patrolling tali akangshitsu tetuyuba agütsüogo, kechiyong Pakistan tsütsülen nungi mapang shia temesepba mozü aser kiralongrarter India-i shibelener arutsü meranger, ta ashi.

Taoba küm September 15 nü ICG-i Pakistan nunger rong ka nung nisung 12 mener lia Gujarat tzüküm nung India indang tzü nung pua liasü.

Gujarat tzüküm ajanga iba amala mesükba rongtem nung temesepba mozü shibelena mapang shia pua arudar.

Taoba küm December 20 nü Pakistan nunger indang anogpuba rong ka nung nisung trok mener lia apu aser parnok ket nung sen crore 400 alang heroin seret 77 bener aliba ICG aser state Anti-terrorist Squad nati pua liasü.

"Indian Coast Guard indang rong Ankit-i Pakistan nunger rong 'Yaseen' nung nisung 10 mener lia Arabian Sea nung India tzü nung January 8 aonung puogo. Ken o ashishitsu atema iba rong ya Porbandar-i anir aruogo," ta ketdangsüri tweet asü.

ICG-i ashiba agi, Pakistan nunger rong ya India nunger tzü-i mile trok-tenet ka aiter liasü aser coast guard indang rong anguba sülen ajentsü meranga liasü.

ICG-i iba rong mapang tatsüka arishiba sülen apu aser rong nung ango seret 2,000 aser totzü litre 600 bener



Tamil Nadu sorkari Covid-19 tashidak prokshia aoba nokdangtsü asoshi Deobarnü senzusenpong masütsü atema tenokdangba agütsüba sülen Chennai nung yimti yimtongtem azüng azüng aliba noksa nung angur.

UP nung JD(U) aser BJP na longjemer tokteptsü: Kushwaha

Patna, Aenjeti/January 9 (Agencies): Mepetmesü aliba special state and caste census ken o dak sendakba nung Bharatiya Janata Party (BJP)-i pua masemtsü telemtetba agira Rashtriya Janata Dal (RJD) state chief Jagtanand Singh-i Nitish Kumar nem teyari agütsütsü benokba sülen Bihar nung yimden yimsüsüba nung temelenshi adoktsü ta bilema aliba tembangogo.

Kushwaha-isa, iba dak sendakba nung BJP den sendakteptsü atema union minister RCP Singh nem nongloktsüogo, ta ashi. "Mapa kangabo aika mali, anungji telemtetba ka yakta agütsü. UP nung onok sentongji takok tashi menden aika nung tokteptsü, ajita asünungdang national party jenjang angutsü atema maongka angutsü. Ajisüaka senden amenba süleang onok menden kwi nungi tokteptsü aji jangjatsü. Onok BJP den longjemer tokteptsü," ta paisa ashi.

Ajisüaka tang UP election dak rangloker lir, kong Janata Dal (United)-i national party jenjang angutsü nükjidong nung menden aika nung tokteptsü, saka BJP nungi menden aikabo angutsü mimlar.

Social analyst Prof Nawal Kishore Choudhary-i ashiba agi, Nitish Kumar-i pa tashi aser tashimait jangja lir aser parnok den longjemer alirtem indanga jangjaa lir. "Pai teka nung aliba ozü kaji süngsempok nung aliba ozü ana dang nungi tajungba ta meteta lir. Pai RJD-i teyari agütsütsü benokba kodanga magizüktsü, kechiyong iba teyari ya kobaika angutsü aji mejangja, anungji BJP den longjemer inyakba ajanga pai aniba party ajangzüktsü ta pai jangjaa lir," ta pai ashi.

JD(U) parliamentary board chairman Upendra Kushwaha-i ashiba agi, National Democratic Alliance (NDA) nung shilem ka ama UP election nung par party tokteptsü, ajisüaka JD(U) menden kwi nungi tokteptsü iba indang mejangja. "NDA nung shilem ka ama onok tokteptsü. Iba telemtetba ya taoba senden nung agia liasü," ta pai ashi.



Sri Lanka Ato Kilonser Mahinda Rajapaksa den Colombo nung majurutep tsungda China indang Foreign Minister Wang Yi (tabelen) osangbenertem den sensaksemba mapang tangokba noksa nung angur. Chinese Foreign Minister Wang Yi-i Deobarnü Ato Kilonser Mahinda Rajapaksa den ajurutepa, tourism, investments aser Covid-19 tebilemtsütem amala onük balala benoka sensaksemogo.

Taliban-i Afghan nunger professor ka apu



Professor Faizullah Jalal aser pa kinungtsü Massouda Jalal noksa nung angur. (File photo)

Kabul, Aenjeti/January 9 (Agencies): Taliban yimsüsüba yimjak nung anemba Afghan nunger university professor ka Kabul nung puogo, ta sorkari otongdar kati ashi.

August-i US-i teyari agütsüba sorkar atsüngtokba sülen Professor Faizullah Jalal-i television talk show balala nung shilem agiogo aser pai linük rogsenketsüing kanga mejungi akümba atema aser nüburtem tashiyim agi yimsü asüba atema Taliban aitsüogo.

Taliban-i sorkar atsüngba sülen parnok anemertem ajak tashiyim agi azüokdar aser tetsür temeden anema longkak aitertem tashiyim agi senshidaktsüba den Afghan nunger osangbenertem aika puogo.

Taliban otongdar Zabihullah Mujahid-i Twitter ajanga ashiba agi, Jalal-i social media nung inyakyim anema nokdaktsü atema nüburtem rongmesoba aser nüburtem meraket den asayaba atema apu.

"Professor mesera scholar tenüing amer pa ama tangaria iba amala nungdak makaba osang meprokshidaktsütsü atema pa puogo," ta pai ashi. Mujahid-i tweet kar lemsatep koba pai ashiba agi, Jalal-i tweet asübatem lir. Tweet nung ashiba agi, Taliban intelligence tekolakba ya Pakistan tashi angar ka aser sorkar tasenba yagi Afghan nungertem ya khadu ama züngshir.

Television nung sensaksem sentong ka nung Jalal-i kasa sentong nung shilem agia aliba Taliban otongdar Mohammad Naeem dang nashi chanu aja, koba Afghanistan nung mezüingmeshi o tulu ka lir. Jalal kinungtsü Massouda, shiba Afghan tsürtem rongnungi tir menden atema tokteper mezüingbula liasü, lai Facebook post ka ajanga Taliban-i pa kinungbo pua benerogo aser pa kong ali mejangja ta ashi.

"Dr. Jalal-i ochi temeden aser linük ajangzüktsü atema nokdakogo aser pa inyakyimtem ajak human rights dak sendaka lir," ta lai ashi. Jalal ya Kabul University nung law aser political science professor ka lir aser pai Afghanistan nunger lenirtem mapang talangka aija arudar.

France nung Anti-vaccine rally ayongzüka agi

Paris, Aenjeti/January 9 (Agencies): Sorkari vaccine magirtem temeden ajemtsütsü atema sentong yangluba anema France nung nisung 100,000 dak temai longkak aita liasü.

France yimtiba Paris nung longkak aitertemi Honibarnü tzünglu aruba den rürjeb laka yimti yimongtem nung longkak aita liasü. Parnoki placard tem nung "Truth", "Freedom" aser "No to vaccine pass" ta zülua amer longkak ait. Longkak aitertem timba mask masem liasü.

Parnok rongnung karibo tir Emmanuel Macron aitsüogo, shiba taoba hopta ashiba agi, pai vaccine magi alirtem libaliro mejungi kümdaktsüner, ajita

asünung dang parnoki vaccine agitsü. Iba dak sendakba nung longkak aitertemi "onoki na kanga tezüdangdaktsütsü," ta ayima senzü.

France nung tang COVID-19 health pass ya "vaccine pass" kümdaktsütsü atema bill ka benokba anema nüburtemi longkak aiter.

France nung Hokolbarnü kija nisung 300,000 dak COVID-19 tashidak potetba sülen iba longkak aiba sentong ayongzüka agia liasü. France indang lower house nung Brehostibarnü, nüburtem chiyongdaki aoba mapang aser intercity train tem nung senzüsenpongba mapang

mesera sobaliba sentong balala nung shilem agiba mapang vaccine dose anaprongla agir aliba kuli sayutsü nungdaka kümdaktsütsü atema sorkar bill ka agizükogo.

Sorkari ashiba agi, iba bill ya January 15 nü nungi tenzüka benoka inyaksangshitsü sentong lir, ajisüaka senate nung legislator tem inyakyim sottsü akok.

French interior ministry-i ashiba agi, Honibarnü longkak aitba sentong nung nisung 105,200-i shilem agiogo. Longkak aitertem rongnung nisung 18,000 bo Paris nung liasü, kong police temi nisung 10 apu aser officer asem terara yirua liasü.

Nigeria nung rakzükkrakdemertemi nisung 200 shi tepset

Abuja, Aenjeti/January 9 (Agencies): Northwestern Nigeria kübok Zamfara state nung rakzükkrakdemertemi nisung 200 shi tepsetogo. Taoba hopta parnok jenoka alidak military-i tayimtsü amshia amakba sülen iba lendong ataloka liasü.

Minister of humanitarian affairs Sadiya Umar Farouq indang otongdar kati ashiba agi, nisung 200 dak tema remogo. "Iba osang angazüka onok kanga mepelar aser jenshia orr alirtem atemaa kanga shisabulua bilemer," ta otongdar-i Deobarnü AFP dang ashi.

State sorkari taoba mapang iba lendong nung nisung 58 asü ta sangdonger liasü. Local tem shirnok Honibarnü tasümgangtem aremstü atema pei yimtsüngtemi meyipa aru parnoki Reuters news agency dang ashiba agi iba lendong nung asür 200 dak tema asütsü.

Military-i Hombarnü Zamfara kübok Tsamre yimtsüing anasa Gusami aremin amak aser lenir ana densema rakzükkrakdemertem 100 dak tema tepset. Iba sülen Mongolbarnü

prangbong amer nisung 300 dak tema motorcycle tem nung mener arua Zamfara kübok Anka temeket nung aliba yimtsüing ti amak aser nisung 30 tepseta liasü.

Parnokisa Bodhbar aser Brehostibarnü Anka aser Bukkuyum district nung yimtsüing 10 amak. Parnoki yimdaklirtem dak injang khaloktsüba den parnok rongsentem auya aser kitem rongtokja liasü.

Kurfa Danya yimtsüing nung alir Babandi Hamidu-i ashiba agi, item nisungtem yagi tajurur ajak dak injang khalokja liasü.

"Yimtsüing 10 nung nisung 140 dak tema remogo aser tasümgangtem maneni bushidar, kechiyong nisung aika samara bushidar," ta Hamidu-i AFP news agency dang ashi.

Tir Muhammadu Buhari-i Honibarnü sangdong ka ajanga ashiba agi, military-i ozüing raksaba teloktem meita aotsü aser parnok samatsütsü atema equipment timba alizükogo. Item teloktem yagi nüburtem tetsübu nung toktsür aser ozüing alema sarusajir.

Buhari-isa, item teloktem samatsütsü asoshi sorkari tanen makai military operation benoka

inyaksangshitsü, ta ashi.

2020 küm tatemlen nungi northwest Nigeria nung nisung pur aoba aser azütokshi lendong aika ataloka arudar aser sorkari temzüing ozüing benoka inyaksangshi mesüteti arudar.

Taoba küm item teloktem yagi school aser college tem nungi kaketshir noklang aika pua bener aoba sülen iba osang alima ajunga ayimsünga

prokshi. Kaketshirtem timba chiokogo, saka ano karbo sota yua lir.

Rakzükkrakdemertem ya kiset shiruru metsürtem aser aluyimertem ali aser rongsen balala raktepba nungi poktet. Ajisüaka küm tem tsüingda iba mangatetep ya tuluba kümaogo.

Nigeria indang armed forces-i taoba hopta ashiba agi, parnoki taoba küm May ita

nungi tenzüka tang tashi nung rakzükkrakdemer 537 tepsetogo aser nisung 374 puogo. Kasa mapang nung item teloktem yagi pur oa aliba civilian 452 kümzüko.

Bello Turji lenisüba nung anidakba telok ya taoba ita parnok jenoka aliba tesem tayimtsü amshia amakba sülen kanga akoksaogo.

(Maneni tapak 10 nung...)



Deobarnü Australia kübok Sydney yimti nung COVID-19 tashidak tendangtsü atema nüburtem atatepba noksa nung angur. Australia nung Honibarnü covid tashidak menar 110,000 ajangogo.

Oscar angur Marilyn Bergman alima nungi pilaogo



New York, Aenjeti/January 09, 2022 (Agencies): Oscar, Emmy aser Grammy takok angur lyricist (kenzülor), Marilyn Bergman alima nungi pilaogo. La arishi küm 93 liasü. Marilyn-i nungtugu ken talisa 'The Way We Were,' 'The Windmills of Your Mind,' 'In the Heat of the Night' aser 'Yentl' nungi ken balala zülutsüogo.

Variety sangdong ka ajanga angazükba agi, Marilyn Bergman ya American Society of Composers, Authors and Publishers (ASCAP) board indang mezüing (tetsür) president aser chairman liasü. 1994 nungi 2009 küm tashi lai ASCAP nung inyakogo.

Marilyn aser la kinungbo Alan Bergman nati 1960s, '70s aser '80s mapang nungtugu film aser TV indang ken zülutsüogo aser 2000s tashi tenati ken atema kenjang balala zülüogo.

Marilyn aser Alan naprongla Oscar atema 16 Ben nominate süogo aser Oscar asem ('Way We Were,' 'Windmills' aser 'Yentl' indang ken ajunga atema) angu. Bergmans (Marilyn aser Alan) yagi mapang shia composers Michel Legrand ('Windmills,' 'Yentl' aser ken tanga - 'What Are You

Doing the Rest of Your Life?' aser 'How Do You Keep the Music Playing?') aser Marvin Hamlisch ('The Way We Were') na den külemi inyaka liasü.

Marilyn asüba osang angashia, ASCAP President aser Chairman, Paul Williams-i aküm agütsü. "Alima ajungai jangja aliba lyricist, Marilyn Bergman, shibai ASCAP atema küm aika bendanga agüja inyakogo, la asüba osang angashia ASCAP nung alir ajak temulung züreper aser asükhu lemsateper. Marilyn ya tasa tasen amshia kenzülur tajung aser takotet ka liasü. Lai la kinungbo Alan den külemi inyakba mapang alimai kodanga mamatettsüsa tenati kenjang tajung aika zülutsüogo," ta Paul-i ashi.

"La ASCAP nung President aser Chairman inyakba mapang nung dang masü, saka taküm piyong music yanglur nübu aika atema la ya tatishitsü tuluka liasü aser iba maparen nung lai kanga tashüta inyakogo. Onoki la kanga menungratsü," ta Paul-i shisem.

Marilyn (Marilyn Keith) ya Brooklyn nung aso aser New York indang 'High School of Music and Art' nung lai music

agi aser NYU nung azüing. Marilyn high school nung kaketshir alidang, mapang shia lai lyricist Bob Russell atema piano atem. Iba mapang Bob-i Marilyn dang kenzülur ka akümtsü asoshi ajungshia liasü.

1950s tom nung Marilyn Los Angeles-i aoba mapang, lai composer Lew Spence atema ken zülutsütsü tenzük aser kopi meli lai Spence den külemi inyaker Alan Bergman ajuruteper. Marilyn aser Alan na 1958 küm February ita kibong aküm.

Tena indang nungtugu ken rongnung 1960 -Frank Sinatra indang kensep track 'Nice 'n' Easy', koba Spence den külemi zülü aser 1959 - Norman Luboff indang kensep atema 'Yellow Bird' dena lir.

1967 küm 'In the Heat of the Night' atema composer Quincy Jones den tenati külemi inyakogo. Ano Legrand den

Marilyn aser Alan longjemer 'The Thomas Crown Affair,' 'The Happy Ending,' 'Pieces of Dreams,' 'Summer of '42,' 'Best Friends' aser 'Yentl' atema ken balala zülutsüogo.

Hamlisch den tenati 'The Way We Were,' 'Same Time, Next Year' aser 'Shirley Valentine,' atema ken zülüja liasü aser item ken ajak Oscar nomination angu. 'The Way We Were' atema 1974 küm tenati Grammy award (song of the year aser best original score album) angu.

Marilyn aser Alan nati 'Tootsie,' 'And Justice for All' aser 'For the Boys' atema composer Dave Grusin; 'Fitzwilly,' 'Pete 'n' Tillie' and 'Sabrina' atema John Williams; David Shire den 'The Promise' aser TV's 'Alice'; Henry Mancini den 'Sometimes a Great Notion' aser 'Gaily, Gaily'; Johnny Mandel den 'Summer

Wishes, Winter Dreams'; Elmer Bernstein den 'From Noon Till Three' aser James Newton Howard, den 'The Prince of Tides' nung inyakogo.

1985 küm ASCAP indang board of directors nung shimer mezüing tetsür rongnung Marilyn aküm aser president mapa toktsür sülena lai board nung maneni inyaka liasü.

Marilyn-i nungtugu kentener Barbara Streisand den mapang talangka tesendaktep tajung yua aruogo aser 1986 küm lai Barbara indang HBO special 'One Voice' atema ken zülutsü aser 1994 küm Barbara indang concert tour (HBO nung 'Barbra Streisand: The Concert' ama sayaogo) atema ken zülutsüogo.

Variety sangdong ajanga angazükba agi, Marilyn-i la kinungbo Alan, jala (Julie) aser semchir (tetsür) ka toktsür asü.

Actor Esha Gupta dak COVID-19 putet



Mumbai, Aenjeti/January 09, 2022 (Agencies): Tesüiba anogo ishika nungi Bollywood nung tongtibang nübu balala dak Covid-19 putetba osangtem ajanga angazüka aruogo. Deobarnü actor Esha Gupta-i la dak iba tashidak putetba osang lemsatepa liasü aser kidang la quarantine südar. Arishi küm 36 tain Esha-i film talisa 'Jannat 2', 'Total Dhamaal' aser 'Baadshaho' nung shilem agiba ajaki jangjaa lir.

Instagram Story nung Esha-i la dak Covid-19 positive

putetba osang fans den lemsatepa liasü.

"Tekümdangtsü meratem agiaka, kü dak Covid-19 positive putet. Protocol ajak nung anidaka aruogo aser tang home quarantine südar. Iba timtem nungi yakta taneptsü angutsü imlar. Nenok ajak dang küm danga alitsü aser teti tejak nembangba mask inoktsü mepishir. Pei atema dang masü saka tangar asoshia bilemjang. Teti #Mask Up inokjangma," ta "Baadshaho" film nung tongti shilem agir Esha-i ashi.

Acting tsütsü, Esha-i film talisa 'Jannat 2', 'Rustom' aser 'Baadshaho' nung tongti shilem agiba nguogo. Web series 'Nakaab' nung lai tesüsa shilem agiogo aser lai 'Invisible Woman' nung Suniel Shetty den külemi shilem agiba angutsü.

India nung Covid-19 wara tasembuba adoker külen nungi Bollywood nung tongtibang nisung balala dak iba tashidak puteta pei pei talidaki quarantine südar. Coronavirus tashidak puteter rongnung Nafisa Ali, Madhur Bhandarkar Prem Chopra, Boney Kapoor, Ekta Kapoor, John Abraham, Vishal Dadlani, Swara Bhaskar, Mrunal Thakur, Arjun Kapoor, Alaya F, Ranvir Shorey, Amrita Arora, Prateik Babbar aser Kubbra Sait nung dena lir.

Honibarnü, Mumbai nung nisung 20,318 dak coronavirus tashidak tasen putet aser iba wara ajanga nisung pungo asü. Tang iba yimti nung nisung lakh 1 dak tema Covid-19 wara agi shirangdar.

Cate Blanchett aser Pedro Almodovar na longjemer

Aenjeti/January 09, 2022 (Agencies): Spain nungger director Pedro Almodovar indang mezüing English feature film atema Cate Blanchett-i pa den longjemtsü terenemba lir. Iba film nungja 'A Manual For Cleaning Women' asütsü aser Lucia Berlin indang kaket (A Manual For Cleaning Women) nung ajemdaker yanglutsü.

Deadline sangdong ka ajanga angazükba agi, iba film atema production maparen tenzükogogo aser Cate Blanchett meyong production company - Dirty Films den El Deseo longjemer film atema senotsü nung yaritsü. Iba project ya director Pedro Almodovar indang mezüing English film asütsü aser pai Tie Me Up! Tie Me Down!, Talk to Her, Pain and Glory, Parallel Mothers densema nungtugu film balala yangluba ajaki jangjaa lir.

1999 küm sayaba film - All About My Mother atema Pedro-i Golden Globe Award den BAFTA Awards ana nguogo.

Cate Blanchett-i film talisa Ocean's 8, Thor: Ragnarok, The Curious Case of Benjamin Button aser nungtugu project balala nung inyakba ajaki jangjaa lir. Tawa, Blanchett-i Netflix indang Don't Look Up nung shilem agiba nguogo. Iba film sayar külen nungi telangzüba tajung nguogo.

Iba film nung also stars Leonardo DiCaprio, Jennifer Lawrence, Ariana Grande, Timothée Chalamet, Meryl Streep, Kid Cudi aser tanga actor balalai shilem agiogo. Cate-isa Bradley Cooper den külemi Guillermo del Toro indang Nightmare Alley nung shilem agiogo.

1960s indang TV series 'The Champions' tanaben yanglutsü sentong lir aser iba project nunga Cate Blanchett-i Ben Stiller den longjemba angutsü. Iba adventure series ya episode 30 tashi sayaogo aser project tasenba ya Stiller-i direct asütsü terenemba lir. Iba den külemi Cate aser Ben nati iba film nung shilem agitsü.

Xiaomi 11i HyperCharge 5G Smartphone India nung sayaogo

Aenjeti/January 9, 2022 (Agencies): Xiaomi company-i India nung Xiaomi 11i 5G aser Xiaomi 11i HyperCharge 5G sayaogo. Phone anaprongla nung 108-megapixel primary, MediaTek chipsets keta lir aser super-fast charging dena support asütsü. Xiaomi 11i HyperCharge 5G yagi 120W fast charging support asür aser iba ajanga minute 15 shi nung phone charge süzüksü. Series tasenba ya sentsü pezü nung angutsü aser India nung Flipkart, Mi Store aser company website ajanga ayoktsü.

Xiaomi 11i Hypercharge nung 120Hz Full-HD+ AMOLED display keta lir aser iba ajang peak brightness 1200 nits support asütsü. Screen nung Corning Gorilla Glass 5 protection keta lir aser phone

teyong nung selfie camera ka inokja lir. Phone indang tesülen panel nung maneni Redmi Note 10 series nung keta aliba EVOL design keta aliba angutsü. Maneni ponglanglen Mi branding melena Xiaomi branding inokja lir.

Xiaomi 11i Hypercharge tesülen camera asem aser LED flash ka keta lir. Tesülen camera tem rongnung 108-megapixel HM2 image sensor, 8-megapixel ultra-wide-angle camera den 120 FoV aser 2-megapixel macro snapper ka densema lir. Tejaklen selfies aser video calling atema 16-megapixel camera ka inokja lir.

Maneni Xiaomi 11i Hypercharge nung MediaTek Dimensity 920 SoC den 256GB storage aser 8GB RAM keta lir. Phone ya Android 11 dak amendaker MIUI 12.5 agi

inyaksangshitsü. Temalen shisema aliba ama 120W fast charging tech yagi phone indang 4,500mAh battery unit ya minute 15 nung charge sütettsü. Tanga features tem ronung IP53 dust and water resistance rating, side-mounted fingerprint scanner, IR blaster, 5G, aser 3.5mm audio jack densema lir.

Xiaomi 11i HyperCharge ya India nung sen 30,000 agi angutsü.

Kasa mapang nung Xiaomi 11i 5G ya HyperCharge model den mesükteper saka iba phone nung 67W fast charging ang keta lir. Phone nung 120Hz display, MediaTek Dimensity 5G, Dolby Atmos speakers, 108-megapixel triple rear cameras, aser virtual RAM support inokja lir. Iba phone ya sen 24,999 agi tenzükur angutsü.

Roy-i 3buba Darts Masters kokogo



Kohima, Aenjeti/January 09, 2022 (TYO): Fun Tree Crew (FTC) ajanga ayongba 3rd Darts Masters nung Kolkata nungi Sangam Kumar Roy-i takok nguogo. Darts Masters ya Honibarnü The Heritage, Old DC Bungalow, Kohima nung asaya liasü, ta sangdong ajanga metetdaksü.

Iba tetoktepba nung Roy-i mezüing aser tanabuba (taoba) Darts Masters indang champion

Vikeheli Souhu madak takok angu.

Roy nem senpet 30,000 den külemi trophy aser certificate agütsü. Kasa tetoktepba nung Suohu-i senpet 20,000 den certificate angu.

3buba Darts Masters indang category balala nung takok angurtemji - Most promising player - Viboto Chishi; Best Checkout - Vikeheli Souhu; Best leg - Shailender Singh Dixit

Thakur aser 'most 180s - Sangam Kumar Roy asütsü. Item category nung takok angur ajak nem senpet 4,000 (4,000 each) agütsü.

Covid-19 wara tenokdangba ajanga 3buba Dart Masters ya taküm (2022) asaya liasü.

3buba Darts Masters nung Nagaland nungi nisung 17, Kolkata nungi 3 aser Mumbai nungi 1 densema asayar 21 agi shilem agiogo.

Bopanna aser Ramkumar nati Adelaide International kokogo

Adelaide, Aenjeti/January 09, 2022 (Agencies): India nunger Rohan Bopanna aser Ramkumar Ramanathan nati kanga meranga asaya arur, Deobarnü Centre Court nung tenati Adelaide International ATP 250 men's doubles title kokogo. Iba ATP tour nung mezüing (tarep) shilem agir India nunger tarep yagi 7-6 (6), 6-1 agi top-seed Ivan Dodig aser Marcelo Melo na tsükdaksü.

Aruya aliba Australian Open 2022 atema renemshiba asayamung nung iba title ya Rohan Bopanna indang 20buba ATP title aser külem India nunger Ramkumar-i mezüing title takok angur asütsü. Tebur tarep final asayaba mapang terepranger rongnung India süir Sania Mirza aser America nunger Rajeev Ram dena liasü.

Iba asaya ghonda ka ser minute 21 nung tembang aser India nunger tarep yagi break point pezüprongla ngutet.

"Ramkumar-i kodang

service yokdar, point kara kara angur aser ibaji maongka tajung ka liasü," ta Bopanna-i ashi.

"Final tashi tongtetta takok anguba ya süngmangseter, kechiyong India nunger aikati iba asayamung nung asayadanga mali," ta Bopanna-i ashi.

Bopanna aser Ramkumar naprongla USD 18700 senpet ama lemdangtsü aser iba asayamung nung tenati point 250 nguogo.

Iba asayamung final tongtettüsü atema, semifinal nung Bopanna aser Ramanathan nati 6-2 6-4 Bosnia-Mexico nunger tarep aser seed pezübuba Tomislav Brkic aser Santiago Gonzalez na tsükdaksü.

Australian Open Qualifiers masayadanga, Adelaide

International takok anguba ya Ramkumar atema kanga tajanzük asütsü. Pai iba Grand Slam indang kija asaya nung tokteptsü tebilemba lir.

Nadal aser Halep nati Melbourne Summer title kokogo



Melbourne, Aenjeti/January 09, 2022: Melbourne Summer Set final nung Nadal aser Halep nati pei pei tata asaya takok ngur sülen trophy amer tangokba noksa nung angur.

Melbourne, Aenjeti/January 09, 2022 (Agencies): Aruya aliba Australian Open nung 21buba Grand Slam title takok angutsü asoshi teimla yur asayasang, Spain nunger Rafael Nadal-i Melbourne Summer Set ATP 250 title kokogo.

Deobarnü, Rod Laver Arena kübok ayongba 'Melbourne Summer Set 1' final nung 20ben Grand Slam champion Nadal-i America nunger Maxime Cressy madak 7-6 (6), 6-3 takok angu.

August 2021 küm Nadal tetsüing nung timtem ajanga tanüingba season nung shilem magitetba sülen, taküm Melbourne Summer Set nung pai takok ngua shilem agiogo.

Rafael Nadal-i ashiba agi, tanaben asayamung nung shilem agia takok marok anguba ya tuluka lir aser Melbourne kübok Rod Laver Arena nung fans ajak dang pai pelaba metetdaksü.

"Kü atema tanga tennis court dang nungiba iba court (Rod Laver Arena) kanga tajungba. Rod Laver Arena ya tanga court dang nungi alakteta junger aser aji nenok (fans) aliba ajanga lir. Nenoki kanga nungita aruogo aser tebang agi rasa

meshitetsüsa nenok dang kangasa pelar. Iba den külemi asayamung tayonger ajak dang pelaba shisemer. Iba court nung tanaben asaya takok marok anguba ya maongka tulu ama züngshir," ta Nadal-i ashi.

"Mapang talangka temang nung timtem agi kangshia arur sülen iba asayamung nung shilem agir asütsü. Tanü iba court nung tanaben asayatsü maongka den takok marok anguba ya kanga dang tongtibang," ta Nadal-i shisem.

Australian Open nung World No. 1 aser defending champion Novak Djokovic shilem agitsü asoshi tebilemstü kar aliba mapang, ajaki sapuba asayar ka ama Nadal-i Australian Open nung shilem agitsü terenemba lir. Taoba hopta Djokovic Melbourne tonga aru, saka 'medical exemption' atema sorkari kuli tejangja magütsütetba dak sendakba nung Australia arutsü asoshi pa indang visa magizük.

Djokovic, shiba Melbourne kübok quarantine facility ka nung mungdar, pa indang visa agienba atema pai court nung ken o benoka lir aser Hombarnü court-i telemtetba ka agütsütsü imlar.

Maneni, kasa asayamung tetsür kija final asaya nung, taoba mapang world no 1 Simona Halep-i Veronika Kudermetova tsükdakja Melbourne Summer Set 1 title kokogo. Iba takok ajanga Australian Open nung takoker ka ama shilem agitsü asoshi Halep nem teimla tulu agütsür.

Halep, shiba temola (calf) nung timtem aliba ajanga taoba küm indang French Open, Wimbledon aser Tokyo Olympics nung shilem magitet, Melbourne Summer nung la temang nung timtem kecha madoki asaya arur, final nung lai 6-2, 6-3 agi Kudermetova tsükdaksü.

Iba asaya mezüing set nung Kudermetova-i junga tenzüik, kong lai Halep indang serve azüika 2-1 agi la tejangdang kümadok, saka anaben Grand Slam takok angur Halep-i telanzüba agütsü aser lai iba set 6-2 agi takok angu.

"Nenok (fans) matsüingdang tanaben idaki asayatsü mapang agi sempettsüba asoshi pelar. Nenoki mapang shia nungitta yariba atema pelaba shisemer aser nenok teyari ajanga tanü iba asaya takok angu," ta asaya temer sülen Halep-i ashi.



Sydney, Aenjeti/January 09, 2022: ATP Cup final nung Canada Team-i Spain Team madak takok anguba sülen Steven Diez, Felix Auger-Aliassime, Denis Shapovalov aser Brayden Schnur nungeri takok marok amer tangokba noksa nung angur.

Nigeria nung... (Tapak 8 nungi...)

Abuja nung amenoker aliba Beacon Consulting Nigeria indang security analyst Kabir Adamu-i taoba hopta AFP dang ashiba agi, military-i meita aoba sentong balala benoka inyaksangshiba ajanga item teloktem yagi yimtsüingtem makyonga aoer asütsü.

"Military-i parnok amakba aser parnok züngsemtem aika asüba ajanga mepelai parnok tanga tesemi belener aotsü telemtetba agi asütsü, aser parnok ainshia aoba mapang yimtsüingtem makyonga aoer ama reprangteter," ta Adamu-i ashi.

Nigeria nung item rakzükrakdemba teloktem ya kiralongrartem ama züngshir aser ibayongji "terrorism" prevention act dak ajemdaker parnok anema jenjang tesashi

benoka inyaksangshitet. Item teloktem nem osang agütsürtem, parnok pusemertem aser item teloktem nem totzü aser chiyongtsü agütsürtem nem temzüing ozüing kübok tapet temerenshi agüja arudar.

IndianOil
CIN - L23201MH1959G011388

Expression of Interest (EOI)

Indian Oil Corporation toh customer kami highway facilities aro rasta laga side IOCL Outlets koikena etya thaka aro bonabole thaka highways /expressways pan India dey bonabole koriasi.

Indian Oil bera aro propose koriatoh ekta panel of parties form koribo, jinto bera ito nonfuel/commercial facilities toh develop, operate aro maintain koribo.

Interest thaka parties khan Indian Oil EOI 2022_MKTHO_145830_1 dey detail bera sabole paribo aro ito toh ami khan laga website www.ioctenders.nic.in dey saikena submit koribhi. Last date ito submit koribole laga date toh 27.01.2022 aro 15:00 HRS ase.

Bidders khan ito EOI toh e-tendering website <https://ioctenders.nic.in> bera download koribole baribo, aro ito dey participate koribole bhi ekki website hei ase.

Corrigendum/addendum, konoba thakile toh, ito bhi opor dey thakiya website dey hei jonaldeybo.

BILEMDANGANG

"Shisa obang o tiar na kasasabo shinga majuruteper."